

平園續稟卷第二十六

廬陵周益國文忠公集六十六

同邑裔孫蓮鑄鑄重校刊

神道碑

敷文閣直學士陳公

良翰

神道碑

嘉泰元年

自紹興壬午迄乾道壬辰十年之間士大夫舉端人正士陳公
邦彥必在焉蓋其議論專以格君非定國是扶持公道斥遠姦
佞爲本當高宗內禪前二日寅之六察以遺孝宗作其卽位徧
歷給諫每行其言立儲之初召長宮寮期大用於他日二聖相
遺如此而歲不我與公則逝矣天下至今惜之其子耆壽等以
書謂某曰先人卽世三十年侍講朱公熹嘗狀其行而墓碑未

立烏臺虎觀之僚道同志合惟公獨在敢固以請予雖老諄尙
能追記大畧乃序而銘之公諱良翰邦彥字也世居台州臨海
縣曾祖咸宜妣吳氏祖懷漸妣朱氏父守中贈奉直大夫妣碩
人洪氏公幼孤天資莊重讀書輒會要旨爲文氣槩不凡中紹
興五年進士第以左迪功郎主紹興府會稽縣簿秩滿升從仕
郎知明州慈溪縣事導德門三鄉渠漑田利民改宣教郎知溫
州瑞安縣轉奉議郎俗號彊梗吏治尙嚴公獨撫之以寬租賦
揭示名物人競樂輸聽訟率得其情或問何術公曰清水明鏡
不可形逃心澄亦猶是矣丁內艱服除充衢州教授轉承議郎
三十一年冬用殿中侍御史吳芾薦入御史臺爲檢察官明年

六月擢監察御史孝宗覃恩轉朝奉郎賜緋魚袋虜主完顏褒
新立求和中原舊人多來歸詔問何以處之公言議和復受降
皆非是自治可也復詢時務公請明階級以修軍政核軍實以
豐財用禁折變以蘇民力省堂選以抑奔競官當久任賞罰當
合眾心隆興元年七月除左正言首陳納諫修德畏天恤民語
極剴切虜移書取海泗唐鄧且邀歲幣公持不可詔遣小使盧
仲賢李拭公言仲賢輕價拭北來難信又言廟堂督府異議恐
失事機楊存中久擅兵權太上皇罷就第奈何復假使名付以
邊事上皆嘉納公因言權宜與虜和名分不可不正陵寢不可
不歸四州不可復與降附不可遣邊防不可弛上曰朕志已定

於是書用敵國禮而降附不復遣俄以戶部侍郎王之望知閤門事龍大淵往議四郡陵寢及歲幣事公與侍御史周操復言四郡固不當議若歸陵寢乃予歲幣聘使未應出境有詔侍從臺諫集議多附公說上爲罷使第命小臣胡昉楊由義充審議官十二月遷左司諫成恭皇后受冊錄內外親屬二十五人公論其泛詔減七人昉由義旣辱命宰相猶議和不止至欲罷督府右正言尹穡助之公言絀不用以直敷文閣知建寧府二年四月也兩淮已徹僭虜遂大入上深悔之太學生數百人伏闕乞召用公等不報用治最就升本路轉運副使作觀風九詠諭厚本善俗之意行部不許治道供帳例餽皆却之改提點江東

刑獄又徙浙西歷朝散朝請郎乾道四年十一月以宗正少卿
召還五年兼權大常又權侍立官又兼權給事中四月擢兵部
侍郎賜服金紫浙東風水敗秋稼州縣隱蔽公白遣漕臣按視
振恤官吏多抵罪兼同修國史轉朝奉大夫十二月除左諫議
大夫臨安帥多創攝局私親故秀守遣吏市燈中都聞公除目
皆懼而輟公入對以敬天愛民修政官人四事爲獻六年正月
戊辰大雨震電庚午大雨雪公請畏天戒正庶事儲位未正手
疏言之先是上雖勉從和好志存恢復有王天覺者用聚斂擊
刺之術迎合爲圖冊因近習以進得樞密院編修官言者交攻
未聽因公極論始去之史正志憚守成都創發運使得留公奏

祖宗立國於汴重兵屯西北故運東南之粟今軍國就食東南此職安用疏累上面再三繼以求去上還其奏公論列不已正志竟罷公嘗言蜀漢之師下關陝由荆襄趨韓魏江淮擣青徐今日大計也四川旣命大臣宣撫荆淮自當一體又言中興初劉光世之部落韓世忠之背鬼張浚之親隨皆擇驍銳優其廩犒以勵諸軍故能所至成功願取以爲法上然之下其疏於諸將宗正寺玉牒書成轉朝散大夫七月進給事中纔兩月節度使成閔冒請眞俸有司坐獲譴閔門王抃矯詔遣妄人謝顯出境顯抵罪而置閔及抃不問公並封勅還之明日改除禮部侍郎固辭不拜以敷文閣待制提舉江州太平興國宮七年起知

婺州未上召爲大子詹事連詔趨行仍命州郡禮遣旣對上勞
勉甚至未幾命公與某同對選德殿手錄唐太宗與魏鄭公論
德仁功利之說批聖語於後使極陳今日之未至者公退而上
疏曰仁德治之本功利治之效務其本則效自至今水旱數千
里流殍萬計是承天意者未至也金陵創營寨役夫凍餒不聊
生是結民心者未至也欲任賢能而張栻一言遽從外補欲退
小人而正志方逐張松繼之松罷韓玉又進矣欲擇將帥而賂
剝交結如初欲收軍情而老幼困於移戍至如詳刑參用武臣
久任乃復數易誠能革此八弊則仁德無累功利自致疏奏上
悅以示輔臣旋命公及某並兼侍講俄以足疾乞去詔聽五日

祖宗立國於汴重兵屯西北故運東南之粟今軍國就食東南此職安用疏累上面再三繼以求去上還其奏公論列不已正志竟罷公嘗言蜀漢之師下關陝由荆襄趨韓魏江淮擣青徐今日大計也四川旣命大臣宣撫荆淮自當一體又言中興初劉光世之部落韓世忠之背鬼張浚之親隨皆擇驍銳優其廩犒以勵諸軍故能所至成功願取以爲法上然之下其疏於諸將宗正寺玉牒書成轉朝散大夫七月進給事中纔兩月節度使成閔冒請眞俸有司坐獲譴閔門王抃矯詔遣妄人謝顯出境顯抵罪而置閔及抃不問公並封勅還之明日改除禮部侍郎固辭不拜以敷文閣待制提舉江州太平興國宮七年起知

婺州未上召爲大子詹事連詔趨行仍命州郡禮遣旣對上勞
勉甚至未幾命公與某同對選德殿手錄唐太宗與魏鄭公論
德仁功利之說批聖語於後使極陳今日之未至者公退而上
疏曰仁德治之本功利治之效務其本則效自至今水旱數千
里流殍萬計是承天意者未至也金陵創營寨役夫凍餒不聊
生是結民心者未至也欲任賢能而張栻一言遽從外補欲退
小人而正志方逐張松繼之松罷韓玉又進矣欲擇將帥而賧
剝交結如初欲收軍情而老幼困於移戍至如詳刑參用武臣
久任乃復數易誠能革此八弊則仁德無累功利自致疏奏上
悅以示輔臣旋命公及某並兼侍講俄以足疾乞去詔聽五日

一朝力辭不允十二月遂告老上知公果病除敷文閣直學士

再提舉興國宮就賜告身衣帶八年四月轉朝請大夫致仕癸

丑卒於正寢享年六十五爵臨海縣開國男食邑三百戶特贈

太中大夫是歲十月壬申葬縣之義城鄉壘石山之原諸子升

朝累贈金紫光祿大夫妻碩人朱氏累贈魯國夫人後公二十

五年薨四男元壽通直郎福建安撫司幹辦公事後十九年卒

耆壽朝請郎新權發遣常州彭壽朝請

別本作散

郎通判沅州廣壽

朝奉大夫行太常丞兼權倉部郎官修身好學皆有家法女二

朝散郎前通判撫州黃朴宣教郎前兼兩浙轉運司務解官吳

洎其壻也孫男十八人文之奉議郎知隆興府新建縣前卒振

之國子進士揚之厚之方之國子進士擇之享之奇之迪功郎
新饒州司戶參軍謙之文林郎新袁州軍事判官孚之誠之太
學生說之拱之淳之詠之挺之存之仔之孫女八人長適迪功
郎南劍州尤溪縣尉范大雅次適進士黃如阜石繼時迪功郎
新撫州金谿縣主簿趙師羔文林郎新潭州湘潭縣丞趙汝适
次在室次適將仕郎趙希賢次尙幼曾孫男女二十一人公質
直好義氣和而守正早爲族父禮部侍郎公輔所知期以遠器
自寒素通顯奉養如一內難後不復入私室用度悉出祿賜未
嘗問產業誨督子孫接誘後進孜孜不倦人有片善力加稱獎
不善卽規正之旣葬十八年光宗踐祚追思舊僚官未應諡特

以獻易其名禮部尙書尤袤之守台也邦人乞祠公於學尤公
以爲宜繪公與提刑羅適及族父小宗伯合而祠之榜曰三老
有奏議文集二十卷銘曰

三聖相授精一惟心大政所咨左右惟人侃侃陳公端諒清醇
鴻漸于朝邁宏厥聲堯老欲傳寘諸臺評重華繼承地禁職親
獻可替否盡忠竭誠身有進退道無訕信繼在震方溫文日新
宮尹孰宜公惟當仁胡不萬年遂都四鄰天以遺直成其令名
我爲銘詩式穀來今不顯臣良於昭君明

敷文閣學士李文簡公

肅

神道碑

嘉泰元年

韓愈以天刑人禍歸咎史筆柳宗元隨闢其說後人終致疑焉

今以李文簡公驗之何疑且左氏紀諸國之事史記上下數千載是是非非利害不專及當世若公續司馬光資治通鑑爲本朝長編上關國體下涉諸臣之家乘非異代比使天刑人禍可信孰能結知明主見推多士生厯清要沒定美謚諸子繼踐世科厯二千石光顯未艾如李氏者乎况公出入中外見謂忠直盡言交游藐視強禦雖微作史自當齟齬難合然讒間不行於朝士大夫鮮含怒者何也守道正蒞位公事上不欺應物無心天人交助其在茲乎旣沒十八年蜀多文士其子不近求銘詩而遠屬耄老非以同朝久相知深也歟是以序而銘之公諱燾字仁甫一字子真系出唐曹恭王季子右武衛大將軍偲武后

斥爲民徙睢州之丹稜縣遂家焉六世孫瑜始復屬籍仕至長
江令公長江十一世孫曾祖夔祖風贈奉直大夫考中朝奉大
夫知仙井監累贈宣奉大夫妣碩人史氏公生政和乙未天資
穎異博覽經傳獨不樂王安石學甫冠已著兩漢鑑明年追念
靖康變故著反正議十四篇人皆奇之紹興八年第進士調成
都府華陽縣主簿未上讀書本縣龍鶴山命曰巽巖自記云子
眞子三十居乃得此山坐東南面西北其位爲巽爲乾蓋處己
非乾健無以立應物非巽順無以行易六十四卦仲尼掇其九
而三陳之起乎履止乎巽此講學之序也語曰可與共學未可
與適道可與適道未可與立可與立未可與權夫人各有所履

善惡分焉惟能謙可與共學惟能復可與適道知所適而無以自立則莫能久故取諸恒當使久於其道或損之或益之至於困而不改若井未始隨邑而遷則所以自立者成矣雖然吉凶禍福橫發逆起有不可知將合於道其惟權乎然非巽則權亦不可行學而至於巽乃可與權此聖賢事業也年方二十四其志趨學問如此久之赴華陽時宰秦檜知公名公不與通會詔郡國舉賢良公攜五十策謁成都帥張燾不果薦秩滿外銓復置教授闕亦不就注嘉州軍事推官丁父憂二十年服除再注雅州軍事推官作當直司箴諷郡守用私情背公法者總領財賦符行中屬公增簡州鹽筴公移書力拒之舊相張浚謂有臺

諫風二十四年改宣教郎知成都府雙流縣日坐聽事訟至立
決前執政李文會自瀘徙益府下行縣供張加倍公用常儀李
由它道去有張氏子競家資公曰汝方在喪忍墜先訓盍歸思
三日復來悔過自新大姓李雱市邸成之產業公以成之不自
所生母追正之雱譴詞訴府公列經義律文宣雱法豪右斂迹
邑庭如水日緡史冊彙次國朝事實謂司馬光修史先爲百官
公卿表十五卷後頗散逸乃徧求正史實錄傍采家集野史增
廣門類起建隆迄靖康合新舊官制成一百四十二卷其重編
者僅七之一長編之書蓋始於此二十九年四川制置使王剛
中辟公幹辦公事三十一年知榮州州因山爲城川爲隍夏秋